

## 44,832 barang tiruan disita

KUALALUMPUR - Bahagian Penguatkuasaan Kementerian Perdagangan Dalam Negeri dan Hal Ehwal Pengguna (KPDNHEP) Kuala Lumpur mengendalik 47 kes yang berkaitan penjualan barangan berjenama tiruan dalam tempoh antara Januari dan Mei lepas, melibatkan sitaan 44,832 unit barangan yang nilainya dianggar berjumlah lebih RM1.6 juta.

Ketua Pegawai Penguat kuasa KPDNHEP Kuala Lumpur, Azeem Nazuri berkata, jumlah sitaan barangan itu mencatatkan peningkatan hampir 35 peratus tahun ini berbanding hanya 33,280 unit bagi tempoh sama tahun lalu.

"Nilainya pula meningkat sehingga tiga kali ganda berbanding tahun lalu yang mencatatkan jumlah hanya RM562,340, namun dari segi jumlah kes, kami berjaya mengendali 75 kes sepanjang tempoh itu tahun lepas," katanya di pejabat KPDNHEP Kuala Lumpur di sini baru-baru ini.

Menurutnya, ia menunjuk-

kan keberkesanan KPDNHEP Kuala Lumpur membanteras kegiatan menjual barangan tiruan itu dan berjaya meningkatkan kadar usaha membanterasnya pada skala lebih besar meskipun jumlah kes berkurangan tahun ini.

Katanya, pihaknya pasti tidak akan mencapai kejayaan dengan nilai sitaan yang besar sekiranya tidak mendapat kerjasama daripada pemilik cap dagang tulen yang banyak menyalurkan maklumat dan hasil risikan bersama.

"Bagi 2018, barangan paling banyak disita penguat kuasa KPDNHEP Kuala Lumpur ialah barang tiruan seperi jam tangan jenama mewah bernilai lebih RM250,000.

"Untuk tahun ini, barang tiruan seperti barangan kulit iaitu beg tangan paling banyak disita dengan nilai menjangkau RM529,600," katanya.

Menurutnya, ada antara peniaga menjual barangan tiruan secara runcit di premis masing-masing, dan ada juga menjualnya secara borong. -

*Bernama*